



TEKS UCAPAN

**YB DATO' SRI HAJAH NANCY BINTI SHUKRI
MENTERI PEMBANGUNAN WANITA, KELUARGA DAN MASYARAKAT**

**PROGRAM JERAYAWARA KASIH KPWK
@ADVOKASI ANTIGANGGUAN SEKSUAL NEGERI KELANTAN**

**HOTEL GRAND RIVERVIEW, KOTA BHARU, KELANTAN
7 SEPTEMBER 2023 (KHAMIS) / 11.00 pagi**

Kemas kini 5 September 2023

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) PENDAHULUAN

1. Alhamdulillah, Segala Puji Bagi Allah SWT, Tuhan sekalian alam kerana dengan limpah kurniaNya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Kelantan.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ketua-Ketua Jabatan Kerajaan Negeri Kelantan dan

Kerajaan Persekutuan, badan-badan korporat, persatuan majikan dan sekerja, pertubuhan bukan kerajaan (NGO) serta rakyat Negeri Kelantan yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini **menunjukkan solidariti, sokongan** serta **kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

LATAR BELAKANG

Puan-puan, tuan-tuan, hadirin yang saya kasihi sekalian.

4. Isu gangguan seksual bukanlah sesuatu yang baharu. Oleh itu, kita perlu sentiasa menambah baik undang-undang semasa agar sesuai dengan peredaran masa. Kini, gangguan seksual bukan sahaja berlaku secara fizikal tetapi juga dalam talian atau *online*.

5. Walaupun masalah ini bukan perkara yang mudah untuk ditangani, adalah sangat penting dan mustahak untuk kita menguar-uarkan dan teruskan perbincangan **isu gangguan seksual serta isu jenayah intip dan hendap atau 'stalking'**.

6. Salah satu cabaran dalam menangani gangguan seksual ialah apabila terdapat sesetengah pelaku mungkin menganggap tindakan mereka sebagai jenaka yang tidak berbahaya atau salah faham. **Ingin saya tekankan di sini, seharusnya tiada ruang langsung diberikan kepada**

gangguan seksual, sama ada secara terang-terangan atau jenaka.

7. Kesan kepada **mangsa atau** istilah yang lebih tepat, **pemandiri gangguan seksual**, tidak terhad pada gangguan mental sahaja. Ianya juga boleh mendorong jenayah seksual yang lebih serius dan kesannya terhadap pemandiri adalah sangat negatif, termasuk trauma dan ketakutan yang berpanjangan.

8. Menurut statistik yang dilaporkan oleh Polis Diraja Malaysia (PDRM), jumlah kes gangguan seksual yang dilaporkan meningkat dari **378 kes pada 2020 dan seterusnya meningkat kepada 506 kes pada 2021**. Walau bagaimanapun, terdapat **sedikit penurunan pada tahun 2022 iaitu kepada 477 kes**. Jumlah kes yang dilaporkan ini adalah melibatkan kedua-dua jantina, lelaki dan wanita.

9. Namun, majoriti pemandiri adalah kaum wanita iaitu sebanyak **354 kes pada tahun 2020, 446 kes pada tahun 2021 dan 416 kes pada tahun 2022**. Statistik ini menunjukkan

bahawa setiap tahun lebih **90 peratus** daripada kes **gangguan seksual** adalah melibatkan pemandiri di kalangan **kaum wanita**.

10. Bagi negeri Kelantan sendiri, pada tahun 2022, **terdapat 11 kes gangguan seksual** di mana **10 kes atau 90 peratus** adalah melibatkan **gangguan seksual terhadap kaum wanita**. (Namun, ini adalah kes yang telah dilaporkan).

11. Statistik ini menunjukkan bahawa gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira jantina, usia, kaum ataupun agama termasuklah kepada **golongan yang tidak berdaya seperti kanak-kanak.**
12. Maka adalah menjadi tanggungjawab semua pihak sama ada ibu bapa, guru-guru, jiran tetangga serta seluruh lapisan masyarakat untuk memainkan peranan melindungi mereka ini daripada dieksploitasi dan terperangkap dengan gangguan seksual.

13. Ibu bapa juga harus lebih peka mendengar dan berani bertindak dalam menangani kes gangguan seksual kanak-kanak.
14. Ibu bapa juga wajar memberi pendidikan seksual kepada anak-anak sejak kecil lagi dan mendidik mereka agar dapat membezakan antara sentuhan selamat dan sentuhan tidak selamat. Kita perlu wujudkan persekitaran yang mana anak-anak bebas bersuara dan berkongsi pengalaman harian mereka.

15. Dengan cara ini, ibu bapa dapat mengesan jika berlaku sesuatu yang mencurigakan atau perubahan pada perilaku anak-anak.

16. Pada pihak Kerajaan pula, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840]**, sebagai suatu **Akta khusus untuk menangani kesalahan gangguan seksual.**

17. Akta ini diharap dapat membantu pemandiri untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada pemandiri.

18. **Penguatkuasaan Akta** ini telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

(B) PELAKSANAAN PROGRAM JERAYAWARA KASIH KPWKM
@ADVOKASI ANTIGANGGUAN SEKSUAL

Puan-puan, tuan-tuan, hadirin yang saya kasihi sekalian.

19. Pelaksanaan **Program Jerayawara KASIH KPWKM@Advokasi Antigangguan Seksual** ini diharapkan agar dapat mencapai objektif seperti berikut: -

- (i) **Memberikan pendedahan** dan pengetahuan kepada masyarakat mengenai gangguan seksual;

- (ii) **Menyebarkan pemakaian garis panduan** dan notis antigangguan seksual kepada semua lapisan masyarakat;

- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan

(iv) **Menjalinkan kolaborasi strategik** dengan semua pihak bagi meningkatkan pencegahan dan kesadaran gangguan seksual.

20. Program ini juga bertujuan untuk memberikan kesadaran, pendidikan mengenai gangguan seksual agar **budaya menormalisasikan gangguan seksual dapat dihapuskan**. Inisiatif yang boleh dilakukan termasuk menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja tentang**

tindakan yang perlu diambil jika ada aduan gangguan seksual.

21. Di samping itu, pelaksanaan ini juga adalah **selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023** yang turut mewajibkan majikan untuk mempamerkan notis mengenai gangguan seksual di tempat kerja.

22. Justeru, KPWKM telah membangunkan **notis antigangguan seksual** yang boleh dimuat turun melalui Kod QR dan laman web Jabatan Pembangunan Wanita (JPW) untuk dipaparkan di setiap organisasi termasuk premis awam dan swasta.
23. KPWKM juga turut melaksanakan Bengkel Kejurulatihan bagi Anti Gangguan Seksual melalui Institut Sosial Malaysia (ISM). Antara objektif bengkel ini adalah untuk **meningkatkan kefahaman dan kemahiran** bakal jurulatih berikaitan isu antigangguan seksual (AGS) serta **menambah baik kaedah**

penyediaan instrumen latihan dalam pengajaran dan pembelajaran *Training of Trainers (TOT) AGS*.

24. Bengkel ini dilaksanakan di enam (6) Zon iaitu di Utara, Tengah, Selatan, Timur, Sabah dan Sarawak. Sehingga Ogos 2023, sebanyak empat (4) siri bengkel yang melibatkan seramai 124 orang peserta telah dilaksanakan dan masih berbaki 10 siri lagi. **Para peserta yang berminat boleh mendaftar di reruai pameran ISM yang ada di sini pada hari ini.**

25. Selain itu, Program Jerayawara KASIH KPWKM @Advokasi Antigangguan Seksual juga bertujuan untuk menguar-uarkan penyampaian perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga dan Masyarakat melalui pelbagai aktiviti dan reruai pameran yang disediakan.
26. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan Kebajikan Masyarakat, Lembaga Penduduk dan

Pembangunan Keluarga Negara, Institut Sosial Malaysia, Lembaga Kaunseling Negara, dan Yayasan Kebajikan Negara.

27. Turut bersama dengan KPWKM pada hari ini ialah rakan strategik Kementerian seperti Jabatan Bantuan Guaman, Agensi Anti Dadah Kebangsaan, Agensi Kaunseling dan Pengurusan Kredit (AKPK), DIGI Telecommunications, Jabatan Insolvensi, PUSPANITA Pejabat Pembangunan Negeri (ICU, JPM), NGO Usahanita dan lain-lain lagi.

28. Selain itu, terdapat juga gerai-gerai jualan produk-produk daripada usahawan-usahawan wanita di bawah Jabatan Pembangunan Wanita, Yayasan Kebajikan Negara dan Jabatan Kebajikan Masyarakat.
29. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

(C) HARAPAN

Puan-puan, tuan-tuan, hadirin yang saya kasihi sekalian.

30. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk untuk bekerjasama agar** kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita**

malahan lelaki jua termasuk kanak-kanak dan setiap lapisan masyarakat.

31. Di samping itu, kita juga masih lagi di dalam Sambutan Bulan Kemerdekaan, saya mengambil kesempatan ini untuk mengucapkan **Selamat Menyambut Hari Kebangsaan yang ke 66, dengan tema: Malaysia MADANI: Tekad Perpaduan, Penuhi Harapan.** Marilah sama-sama kita berganding bahu menyemarakkan ikatan perpaduan sesama kita.

32. Izinkan saya mengakhiri ucapan dengan serangkap pantun:

Mari Kelate makan pengat pise,
Singgah semeta di Wakaf Che Yeh,
Dengar sini kawe nok pese,
Pakat jaga sek kita deh.

33. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual Negeri Kelantan.**

Sekian, Wabillahi taufiq walhidayah

Wassalamualaikum warahmatullahi Wabarakatuh.

YB DATO' SRI HAJAH NANCY BINTI SHUKRI

Menteri Pembangunan Wanita, Keluarga dan Masyarakat

7 September 2023